

Fut kale Sekow em Bose Fut kale.

¹ Kalun kel Isalael kawtiw num mongom kunum waneng banban yutaka! Sunbin-Got so Kamok Fian Yesus Kulais so yelim im sak weng afak ke alakabi kunum Sekow nete fut kale boko, yukalem abiw koleweco, nanew kawtiw im aneng aneng unsiliw kunum waneng yulo dabalako, “Ken biliw yako!”, yangi te.*

Kal Ilum Ding Akal Kalfong so Kemin Em Weng te.

²⁻³ Nakunum kumel kunum waneng yutaka! Anggil ilum deiw banban kele ding dim akati, yu kalfongeko, “Seyo! Ilum tele be num fein ibolow beelo kitil keyembe kai!”, angeko, kakatemoliwka! Nimtew angom? Yu kitil biliw angiw tewe, yu kalaing kuw keko, yom fein ibolow e nam de mit dayemoke kasike.*

⁴ Yu kalaing kuw keko, fein ibolow kukuw kitil auliw tewe, ilum daokemin kukuw be yom dim kel atin kuw fian kebelei, yom ken kekabiliw kukuw be atin kuw Sunbin-Got em ken kukuw beso ki keme te.

Sunbin-Got eso Weng Bakamin em Weng te.

⁵ Nimin yom mutuk biliw kunum waneng ite mak “Yake! Num fukunin e sukum gel kai!”,

* **1:1:** Matyu 13:55; Kalan Kunum 15:23; Galesia 1:19; 1 Fita 1:1

* **1:2-3:** Ulom 5:3-5; 1 Fita 1:7

angbiw tewe, yu Sunbin-Got elo dakalakamoliwka! Feinka! Sunbin-Got e yom weng be kiliko, “Bayo!”, anginba kebomi, yom dakalaliw eisneng be fein kalfong so kesomi, ki keyembomelei, gal keko, digaka keyeminba kekabe te.*

⁶ Kate, dakalaliw kunum waneng bikati kanelom ibolow alew banban kesomi, dakalakamoliw te! Keko, dakalakamiw tewe, im ibolow fukunin e inim em ais kon falit fu ka ka kelin emdiw kebiw kasike.

⁷ Kanekabiliw kawtiw i kanelom im ibolow e “Sunbin-Got e mesesem mak duyemoke kai!”, angbokoliw te! Atin kuw bate!

⁸ Besik nimtew angom? Im fukunin e atin kuw dolo dolo banban kebombiliw kasike.

Em so Kawtiw so, Baluw Kawtiw so, im Sang te.

⁹ Em banim keko, Kulais em angin kelewkabiliw kunum waneng i kalfongeko, “Sunbin-Got em kiin dim e nu wiin so kebuluw kae!”, angboliwka!

¹⁰ Angiwi, mali fein ibolow so emso kunum waneng ikati kalfongemoliwka! Nimtew angom? I kilele kal keliwete: “Sunbin-Got em kiin dim e on kisol be sak banim eisneng ete kuw te!”, angeko, kal keliwi, ikati mali kunum waneng imdiw ais bokbok kait atew keko, kuanokoliw kasike.*

¹¹ Feinka! Ataan tele ding kabalak e, mamin keko, mesesem eisneng be fulko, geet kelewei, kait ken ati alik bakati fulko, banim keyemkabe atew te. Beemdiw, emso kawtiw im kanekabiliw beem aluwbamin ibolow fukuneko, aluwkabiliw ding dim bakate, ikati kuanokoliw te.

* **1:5:** Ken Abin 2:3-6 * **1:10:** Aisaya 40:6-7

Kal Dim em “Kanela!”, Angei, Ki Kelemin em Weng te.

¹² Ilum tele ding dim e, nanbow keko, kal dim em “Kanela! Kanela!”, yangbe ibolow be ilo kiskis keyembe beelo de mit da kolewkabiliw kunum waneng i kalfong keko, kakatemoliwka! Nimtew angom? Sunbin-Got elo ibolow mutuk fian dulewkabiliw kunum waneng bi akalem ilo “Sunsun finik so bin yan atite be ilo duyemoki te!”, yangse yan ken be fein kulokoliw kasike.

¹³⁻¹⁴ Yutaka! Sili sili nam kukuw e Sunbin-Got elo kak kelewinbakabe kasike, e mali kunum waneng “Yu sili sili kukuw kelina!”, yanginba kekabe te. Kasike, yu kanelom bokolomeliw: “Sunbin-Got ete nulo ‘Yu sili sili be kelina!’, yangbaka.”, angbokoliw te! Babo! Yu yukalem kal dim em fimdi famde dasuw weng em “Kanelina! Kanelina!”, yangakabe ibolow bete kuw kiliko, sili sili kukuw em deiw gelewkabiliw kunum waneng yute te.

¹⁵ Ibolow tem em “Kanelina! Kanelina!”, angbe beem kiskiw e waneng im aul kumun kekabiliw atew te. Sow em ding dim bakate, im aul dukukabiliw atew keko, sili sili kukuw e aul atew dukuliwi, sili sili beem yan e ilo yenei, i kuanokoliw te.

¹⁶ Nakunum kumel ibolow mutuk fian duyemkabi kunum waneng yutaka! Yu kanelom kak keyemomin beem mongom ete teifuluko, kakamokoliw te!

¹⁷ Ken eisenng nu sak misim kuw kulukabuluw mesesem eisenng alik alik angom be abiil tikin katem alakabe ailbin dukuse Aatim ete nulo sak misim kuw duyemkabe te. Yu kilele ibolow

fukunina! Num Aatim be kayow so ataan so biim ailbin takak so emdiw alwol alwol kelinbakabe te.

¹⁸ E akalem ibolow fukunin ete kuw geleweco, “Ilo nem muluwel keyemii, i nakalem mesesem mesesem eisneng kaisi alik alik angom biim imisik keyemo yo!”, angeko, akalem min em kanese beem fein sang beem mongom elote alik nulo akalem aul keyemse te.*

Weng Kiliko, Gelewemin em Weng te.

¹⁹ Nakunum kumel ibolow mutuk fian duyemkabi kunum waneng yutaka! Alik alik yu kanelom sak weng bakamin fian kelewbokoliw te! Kate, yu falit angeko, fongate akate kilele kili kemoliwka! Kebomeliwi, yu kanelom, fongate akate kaisuw kemokoliw te!

²⁰ Nimtew angom? Kawin dim kaleem kawtiw num kaisuw ibolow be Sunbin-Got em kiin dim e “Yu kiol kuw kukuw kanelina!”, yangakabe kiol kukuw beelo ki kelinbakabe kasike.

²¹ Keko kasike, wa ibolow silikmoyembe beso, wa kukuw kebiliw beso, alik alik be makuw kulu kolew kemoliwka! Kebomeliwi, yu yukalem ete menew falit angebomeliwi, Sunbin-Got em yom ibolow tem kaise weng bete kuw kuloliwka! Feinka! Weng be ki keko, yom kuankemin kakabiliw deiw beelo bul gewsi belei, okileweco, Sunbin-Got em mit finik so deiw mo koyemkabe kasike.*

²² Kate, yu bokoyemse weng kale kilele kiliko, gelewemoliwka! Yu kanelom sak kilikemin kunum waneng kuw kemokoliw te! Kemiw tewe,

* **1:18:** Sion 1:13 * **1:21:** Kolosi 3:8; 1 Fita 2:1

yu yukalem ibolow mutuk elo dasuw kelew-
bokoliw kasike.*

²³⁻²⁴ Nimin kunum waneng ite mak Sunbin-
Got em weng kale kiliko, gelewinda kemiw tewe,
im kanekabiliw kukuw beem kiskiw e kanekote:
Mak kunum mak oktakak kuluko, akalem ki-
inguen atemeko, famdes unoke bakate, iti fongate
akate akalem kiinguen ibolow akokow kekabiliw
emdiw te.

²⁵ Kate, yu Sunbin-Got em sili sili kukuw nulo
sok so ge koyembe sok be silel koyemse kitil kiol
kuw sawa weng bete kilele atemeko, kal kemoli-
wka! Kebomi, em weng kiliko, fongate akokow
kelinba kebomi, kilele gelewbiw tewe, Sunbin-
Got e yom aluwbamin be bamki so keyemboke
te.*

²⁶ Yu kilele ibolow fukunemoliwka! Mak
kawtiw mak bokolomeliw: “Nu Sunbin-Got em
wiin daolewkabuluw kawtiw nute te!”, angaka-
biliw kate, i ikalem bontem dim kilele wangweng
keleweko, atebinba kemiw tewe, i ikalem ibolow
mutuk elo dasuw kelewko, ikalem Sunbin-Got
em wiin daolewkabiliw kukuw bakati sak dasuw
kuw te.*

²⁷ Yu Aatim Sunbin-Got em kiin dim elo wang-
weng kiol kuw daolewkemin kunum waneng ke-
biliw tewe, yu mali waneng kalun so, aul gasol so,
im kal ilum be kinkin keyemeko, dakayemboli-
wka! Dakayemsomi, yu kitil keliwi, kawin dim
kaleem ninik so kukuw be kanelom yom ibolow
mutuk bakati wa keyemoke te!

* **1:22:** Matyu 7:26; Ulom 2:13

* **1:25:** Ulom 8:2; Sekow 2:12

* **1:26:** Sim Fut 141:3

2

Ibolow Ki Makmak Kemin em Weng te.

¹ Nakunum kumel kunum waneng yutaka! Nukalem Kamok Fian wiin fian so kunum Yesus Kulais elo fein dangbiliw kawtiw yu kanelom mali kunum waneng ilo diweko, atin kuw mali ilo ibolow mutuk so dukayembomi, mali ilo ibolow keyeminba kemokoliw te!*

²⁻³ Emso kunum mak ilim ken ati minggisomi, kait kesom, yom wensankabiliw am matem tele tewe, yu elo wangweng kelomi, ibolow keleweko, “Ku abin ken kalak teleko, teina o!”, dangbiliw te. Dangbomeliwi, baluw kunum mak akati sak ilim tulum ninik nam so minggiko, tele tewe, yu elo bokolewomeliw: “Ku sak ka kel mola! Beni, nem yan afak ka kel teina!”, dangakabiliw te.

⁴ Yom kanekabiliw be kilele kaleyemomele: Yu yukalem mutuk dim kel mali kawtiw ilo ibolow mutuk fian duyemsomi, mali ilo ibolow mutuk fian duyeminba kesomi, yukalem fukunin wa geleweko, mali kawtiw biilo sak diwyemkabiliw te.

⁵ Nakunum kumel kunum waneng yu nem weng kale kilele kililina! Sunbin-Got e kawin dim kaleem sak em banim kebiliw kawtiw ilo galmoko, fein ibolow fian keyemkabe te. Feinka! Mali “Ibolow mutuk fian dunemkabiliw kunum waneng yu nem gawman dim em kasel kelokoliw te!”, yangse baluw kawtiw bite kuw akalem gawman dim elo fein uneko, diwkuw ka kel bokoliw te.*

* **2:1:** Kalan Kunum 10:34; Sekow 2:9 * **2:5:** 1 Kolin 1:26-28

⁶ Kate, yu mali wiin banim kawtiw biilo sak inkal duyembabiliw te. Kame yu kilele ibolow fukunemoliwka! Kante yulo de mit da koyemkabe a? Kante yulo diwyemin kunum im kiin dim kel mo koyemsomi, geyemkabe a? Kanekabiliw kukuw be on kisol so kunum ite kuw kanekabiliw te.

⁷ Kate yu kilele kililina! Kanekabiliw kawtiw bite Sunbin-Min Yesus Kulais em wiin atite yulo amkoko, galmose wiin be de mit da kolewkabiliw te.

⁸ Nakunum kumel kunum waneng yutaka! Yu Kamok Fian Sunbin-Got em fut tem kel nulo duyemse weng ayem kitil nam bokolomele:

“Yukalem ibolow mutuk fian e yukalem dim biyembe beemdiw yom mewso biliw kawtiw mali ilo akati ibolow mutuk fian kukuyem kemoliwka!”

angeko, gelewiw tewe, yu ken kukuw kuw gelewbiliw bakate.*

⁹ Kate, yu atin kuw mali ilo ibolow mutuk so dukayembomi, mali ilo ibolow keyeminba kemiw tewe, yu sen so keko, sili sili nam kawtiw kebomi, kukuyemin sawa weng beelo sakalaw keko, weng bo bo kelewsomi, elo de mit dakamin kawtiw kebiliw te.*

¹⁰ Yu kilele ibolow fukunina! Nimin kawtiw ite mak alik kukuyemin sawa weng be gelewbomi, gel makmak bakilewiw tewe, fong gel beem sen e fian kukuyemin sawa weng alik alik dawkatikoko, de mit dakabiliw te.*

¹¹ Nimtew angom? Sunbin-Got e bokolomele:

* **2:8:** Kunum Ayem 19:18; Matyu 19:19; Galesia 5:14 * **2:9:** Sawa Weng 1:17 * **2:10:** Matyu 5:19

“Yu kanelom osow kemokoliw te!”

“Yu kanelom mali ilo yeniwi, kuan kemokoliw te!”

angse kasike, mali yu kiliko, em weng geleweko, osow kelinba kebiw kate, yu mali ilo yeniwi, kuaniw tewe, yukati kukuyemin sawa weng beelo sakalaw keko, weng bo bo kelewbiw kawtiw yute te.*

¹² Kaneko kasike, Yesus Kulais e yom sili sili nam em yulo net keyemse sok silel koyemeko, yulo akalem kukuyemin sawa weng kikis em afak da koyemse te. Kasike kame, yu kukuyemin sawa weng kikis beem afak kuw kakabiliw kunum waneng kebomi, weng atite kuw bakabom, kukuw ken ati kuw gelewemoliwka!*

¹³ Kaneko kasike, yu ibolow fukunemoliwka! Deiw mak ding dim bakate, Sunbin-Got e kawtiw alik alik diwyemoke te. E mali kinkin kukuw kemaliw kawtiw so, mali kinkin keyeminba kemaliw kawtiw iso, alik alik makuw bongguko, im kanemaliw kukuw bakate diwyemeko, geleweko, bikalem kinkin kukuyemkabiliw kukuw gelewko, im kanekabiliw beem yan be fein duyemoke te.*

Dem so Banim Fein Ibolow e Soson Nam te.

¹⁴ Nakunum kumel kunum waneng yutaka! Mali mak yu bokolomeliw: “Nu Kulais elo ‘Fein!’, dangeko, gelewkabuluw kunum waneng nute kai!”, angbiw kate, yu ken kukuw gelewinda keliw tewe, yom fein ibolow akal sak dem banim kuw keko, yulo dokoyeminba kekabe te.

* **2:11:** Aneng Kolew 20:13-14; Ulom 13:9 * **2:12:** Sion 13:34;

Galesia 6:2; Sekow 1:25; 1 Fita 2:16 * **2:13:** Matyu 5:7; 18:32-35

¹⁵ Keko beli, mali fein ibolow so kunum waneng kate, imikel sak kal fitew kebomeliwi, wanin banim kebiw tewe,*

¹⁶ mesesem emso yusik sak weng kuw bokoye-momeliw: “Nakunum kumel yu ken biliw yako! Kal kasilina! Wanin wanbina! Ken abin kulina!”, yangbiliw kate, yu ilo kinkin keyemeko, kal dim em ki ke dakayembin eisneng be yemeninba keliw tewe, yom fein ibolow be sak dem banim kuw keko, mali yukalem ilo dokoyeminba kekabe te.

¹⁷ Keko kasike, fein ibolow akati emikel kuw keko, dem banim kele tewe, e kuankabe te.

¹⁸ Kate, mali kawtiw mak dasuw weng beem kokmen atew keko, bokolomeliw: “Mali kunum waneng numdiw fein ibolow so kebiw kai! Kate, mali kawtiw mak i ken kukuw kuw kekabiliw te!”, angakabiliw kate, ne yulo weng mak bokoye-momeli: “Yom fein ibolow dem banim so be nelo kalenemiw tewe, nesik yulo nem ken kukuw kaleyemii, yu nem kaneyembi beem mongom e nakalem fein ibolow bakati kilele atemokoliw te.”, yangakabi te.*

¹⁹ Feinka! Yu ken keko, bokolomeliw: “Sunbin-Got e makmak ete kuw te!”, angbiliw kate, sawkal aneng matil ikati yom angakabiliw emdiw angeko, bomi, walwal yebom, biliw te.

²⁰ Ibolow benemin kawtiw yutaka! Nesik yom ibolow dolon keyemii, yu kiliko, kilele kal keliwete: Fein ibolow emikel kuw keko, dem banim kele tewe, atin kuw sosen eisneng kekabe te.

²¹ Yu kililina! Sua sua kel ding dim bakate, num awalik Abalakam e akalem min Aisak elo

* 2:15: 1 Sion 3:17 * 2:18: Galesia 5:6

aik ayem dim anko, Sunbin-Got elo dulewomin kese ding dim kabalak e, Sunbin-Got e em kanese kukuw be atemeko, “Ku kiol kuw kunum kute te!”, dangse kale.*

²² Kame yu em kanese kukuw be kilele atem-someliwi, kal kemoliwka! Em fein ibolow so, em kanese kukuw beso, amkoko, bonggu makmak keko, dokolewse kale. Kasike, akalem kanese kukuw be em fein ibolow beelo ki keleweko, fulkilas kelewese kale.*

²³ Kanese beem mongom ete Sunbin-Got em fut ayem tem em weng bose weng be ki kelewese te. E bokolomele:

“Abalakam e Sunbin-Got elo ‘Fein!’, dangse kasike, beem mongom ete esik bokolomele: ‘E kiol kunum te!’, angse te.”,

angei, mali kawtiw i Abalakam em dulum elote bokolomeliw: “Abalakam e Sunbin-Got em ibolow so awkunum ete te!”, dangsiliw kale.*

²⁴ Kane dangse kasike, yu kilele atemiwete: Sunbin-Got e nukalem fein ibolow ete kuw atem-inbakabe kate, nukalem fein ibolow so, bakalem dim gilakabe dem ken beso, alew makuw bonggu, beem dulum elote “Yu kiol kuw kunum waneng yute te!”, yangakabe te.

²⁵ Iti beemdiw sua sua kel, Yosua em bise ding kabalak e, deiwkim waneng Elakaw u kiinkiin kunum alew mak ilo kukuw ken kuw kukuyem-somelui, u aso ilo okiwda koyemeko, nanew deiw yemdasa kale. Sunbin-Got e um kanelu kukuw

* **2:21:** Talfut Kese 22:9-12 * **2:22:** Kibulu 11:17-18 * **2:23:** Talfut Kese 15:6; 2 Kamok im Sang 20:7; Aisaya 41:8

bete atemeko, um dulum elote “Kiol kuw waneng ute te!”, angse kale.*

²⁶ Kasike yu kiskiw weng kale kilele ibolow fukunemoliwka! Mak kunum mak em finik e kal dim be kolewe tewe, e fom keko, kuanaka. Beemdiw, ken kukuw e fein ibolow kolewe tewe, fein ibolow akal fom keko, kuanin tew kekabe te.

3

Bontem elo Wangweng Kelebin em Weng te.

¹ Wee, nakalem nakunum kumel kunum waneng yutaka! Banban kunum mak i kanelom “Nu kukuyemin kunum keluma!”, angbokoliw te! Kate yu kilele ibolow fukunemoliwka! Sunbin-Got em weng kaleyembom, bakayemin kunum yu kilele kutesomi, mali ilo bakayemboliwka! Nimtew angom? Sow e, Sunbin-Got esik num weng kukuyemin beso, num kukuw beso, kilele diwyemeko, beam dulum elote nulo atin kuw geeyemoke kasike.

² Yutaka! Alik nu banso ding mak num “Kane-muma!”, angbuluw be bakileweco, gelewinbak-abuluw te. Kate, mak kunum mak weng wa wa mak bokolinba kele tewe, e ki keko, akalem kal dim em “Kanela! Kanela!”, angakabe alik alik bakati de mit dasomi, sen so banim kiol kuw kunum keko, boke te.

³ Yu fakam weng kale ibolow fukuneko, atemoliwka! Kawtiw i em dim tein kakamin kos em bontem dim elo ain atuk mak dukulewsomeliwi, kos be akalem dem so makuw kawtiw im fukunin bete kuw gelew unakabe te.

* **2:25:** Sosua 2:1-21; Kibulu 11:31

⁴ Beemdiw, siw akati fian eisneng sel kate, inim fian tele tewe, siw fian beem ka une ka une kiol kelewkabe eisneng fong gel be siw am fian be de kakabomi, elo aluwkabe kunum beem fukunin kuw gelewko, unakabe te.

⁵ Keko beemdiw, foong e kal em atuk fong gel eisneng kate, weng anyam fasu fian kelewkabe te.

Ais dong akati beemdiw te. Ais kikin fong gel abulokoliw kate, dong aileko, nengso nengso uneko, kut aneng fian beso kainkabe te.

⁶ Yu ibolow fukunemoliwka! Foong akati ais dong beemdiw te. E kal em atuk fong gel eisneng kate, kukuw wa wa fian kuw banban beem sen mongom te. Em sen ete alik alik kal so dem so inkal eisneng keyemkabe te. Seten-Ataanim em weing dong e foong be ais emdiw silikmolewbele, num kal so kun so alik alik makuw kainkabe te.*

⁷ Nakunum kumel kunum waneng yutaka! Kawtiw nusik kawin dim kaleem samal so, awon so, kawin dim kel donong kekabiliw samal so, okmun tem biliw samal so, alik alik ilo yetemalak-abuluw kate,

⁸ nukalem foong ete kuw alik nu kilele wang-weng keleweko, atebinba kekabuluw te. Feinka! Foong ete diwkuw diwkuw wa wa kukuw kuw kebomelei, kimon atew keduku koyemeko, yenkabe te.*

⁹ Nu nukalem bontem dim foong e Sunbin-Got em wiin fian daolew kesomi, iti famdes angeko, mali kawtiw Sunbin-Got akalem takak atew kaise kawtiw ilo yakok keyemkabuluw te.

* **3:6:** Matyu 12:36-37; 15:11,18-19 * **3:8:** Ulom 3:13

¹⁰ Nakunum kumel kunum waneng yutaka! Sunbin-Got em wiin fian daolew kemin weng so, mali kawtiw ilo yakok keduku kemin weng so, alew weng be bontem makmak kuw matem talakabe te. Kate yu kanelom wa kukuw keko, foong dokon kemokoliw te!

¹¹ Feinka! Ok miktem telebe ok abal so, ok kumun fian em ok wa so, alew i bongguko, miktem makmak matem telinba kekabiliw te.

¹² Beemdiw, tonggol sen so, seil sen so, i bongguko, dem makmak gilalinba kesomeliwi, ok wa so ok ken so ikati ok miktem makmak telinba kekabiliw te. Kasike yu kanelom ken weng so, wa weng so, makmak bongguko, foong dokon kemokoliw te!

Fukunin Ken em Sang te.

¹³ Yom biliw mutuk be mali kunum waneng mak kal fian so fukunin ken mak biw tewe, i ibolow menew falit kukuw ken so mali kawtiw im kiin dim e kilele kakamoliwka!

¹⁴ Kate, “Nu kal fian so kawtiw nute te!”, angakabiliw kawtiw yu diwkuw mali ilo on keyemeko, yukalem ibolow ete kuw fukuniw tewe, yu kanelom yukalem wiin elo beemdiw dao kemokoliw te! Kemiw tewe, yom kanebiliw kukuw be fein weng beelo de mit dako, dawkatiko, kolewkabe kasike.

¹⁵ Feinka! Beemdiw angakabiliw kawtiw yom kal be abiil tikin elote keko, telinba kekabe te. Be kawin dim kaleem fukunin so, kawtiw yukalem fukunin so, Seten-Ataanim em fukunin so, biim dulum elote keko, talakabe te.

¹⁶ Yu kililina! Nimin kawtiw ite mak mali kawtiw ilo on keyembomi, ikalem ibolow ete kuw

gelewbiliw tewe, kanebiliw kukuw beem dem e ikalem ken abin teininba kebomeliwi, kukuw wa wa kuw kekabiliw bakate.

¹⁷ Kate, fukunin kal fian abiil tikin beem dulum elote talakabe beem dem e kanekote:

Mak e ibolow fukunin kiol e,
 mak e ibolow menew e,
 mak e ibolow falit angebin e,
 mak e mali im weng afak kemin e,
 mak e mali ilo diwkuw diwkuw kinkin keye-
 meko, ilo ken kukuw kukuyem kemin e,
 mak e alik alik ilo ibolow mutuk fian ki mak-
 mak keyembin e,
 mak e fimdi famde kelinba keko, fein kiol kuw
 kukuw kakamin ete te.

¹⁸ Nimin kunum waneng ite mak mutuk kawtiw kebiw tewe, i wanin diwing ken ati emdiw kailiwi, im menew ibolow be kawin kale akal, abiil tikin kel akal, dem ken ati mak gilakabe te.*

4

Sunbin-Got em Afak Kuw Bin em Weng te.

¹ Nakunum kumel kunum waneng yutaka! Yom ken abin beelo ganbin kukuw so, kaisuw kukuw so, kukuw wa alik alik be wenkabe beem mon-gom e nimtew a? Yukalem ibolow mutuk tem em “Kanelina! Kanelina!”, yangsomi, ganbin beem mongom ete kanekabiliw bakate.*

² Yu mesesem mak “Kulumo!”, angakabiliw kate, yu kulinba kekabiliw te. Yu mali kawtiw ilo on kebomi, yensomeliwi, mali iso ganbomi, weng anyam kekabiliw kate, yu mesesem eisneng mak

* **3:18:** Matyu 5:9; Kibulu 12:11 * **4:1:** Ulom 7:23

kulinba kabiliw te. Nimtew angom? Yom Sunbin-Got elo dakalalinba kekabiliw beem mongom ete te.

³ Yu mesesem mak “Kulumo!”, angeko, Sunbin-Got elo dakalakabiliw kate, yu kulinba kabiliw te. Nimtew angom? Yu yukalem kal dim em ibolow fukunin ete kuw gelewko, em “Kanelina! Kanelina!” angakabe beem dulum elote kuw elo dakalakabiliw kasike.

⁴ Osow keko, ukalem imok kolewkabiliw waneng imdiw kesomi, Sunbin-Got elo kolewsomi, ibolow alew so kawtiw kebiliw yu kilele ibolow fukunina! Yu kawin dim kaleem kukuw gelewih tewe, yu Sunbin-Got elo koleweko, elo ibolow kaim alel kelewkbiliw te. Feinka! Nimin kawtiw ite mak kawin dim kaleem kukuw kalfong keliw tewe, i Sunbin-Got elo maka kelewkbiliw bakate.*

⁵ Yu kililina! Sunbin-Got em fut ayem tem e bokolomele:
 “Nakalem Sunbin-Finik ne kunum waneng im mutuk dukuli be nakalem elo deitko, ‘Elo kanelom kolewokoliw te!’, yangakabe te.”,
 angse kale.

⁶ Feinka! Sunbin-Got e ibolow folok so keyemkabe Sunbin-Got ete te.

Beerndiw, nu Sunbin-Got em fut ayem tem kel atemuw:

“Sunbin-Got e mali kawtiw mak ikalem wiin daokabiliw kawtiw ilo de mit da koyem kekabe te.

Kate, e ibolow falit kawtiw ilo ibolow folok keyemkabe te.”*

* **4:4:** Ulom 8:7; 1 Sion 2:15 * **4:6:** Sim Fut 138:6; Ken Abin 3:34;
 1 Fita 5:5

⁷ Kasike, yu yukalem wiin de mit dako, Sunbin-Got akalem fukunkabe beem afak kakamoliwka! Kakamokoliw kate, yu kitil keko, Seten-Ataanim elo maka kelewboliwka! Kelewbiliw kano, e fon unemomeka!*

⁸ Nakunum kumel kunum waneng yutaka! Yukal uneko, Sunbin-Got em mit mewso kebolowka! Kebiliwi, e akal yuso mewso keko, boke te. Kasike, ibolow alew kawtiw yutaka! Yukalem sili sili ibolow be teing ok gingemin atew gingeko, em kiin dim e ibolow kiol so kakamoliwka!*

⁹ Feinka! Yu sakik keko, ibolow tiaktiak kebomi, amebom, boliwka! Yom kalfong so abenggibiliw bakati kolewoko, sakik so ibolow ilum so kebolowka!

¹⁰ Kanebiliw tewe, Sunbin-Got em kiin dim e yukalem wiin de mit daliw kasike, e yulo wiin fian so keyemboke te.*

Mal ilo Yemdako, Geeyemin em Weng te.

¹¹ Nakunum kumel kunum waneng yutaka! Yu kanelom mali kawtiw ilo de mit da koyem kemin weng bakamokoliw te! Nimtew angom? Sunbin-Got ete kuw kawtiw ilo diwyemeko, geeyemkabe kasike. Nimin kawtiw ite mak mali kawtiw ilo geeyembomi, ilo de mit da koyemiw tewe, i Sunbin-Got em kukuyemin sawa weng elo akati geelewbomi, bakilewkabiliw te. Kaneliw tewe, kawtiw bi Sunbin-Got em kukuyemin sawa bokoyemse weng beem afak kakamin kawtiw kelinba kebomi, elo diwoko, geelewbini kawtiw atew keko, biliw te.

* **4:7:** Efesus 6:12 * **4:8:** Aisaya 1:16; Sekalaya 1:3; Malakai 3:7

* **4:10:** Sow 5:11; 1 Fita 5:6

¹² Feinka! Sunbin-Got ete kuw kukuyemin sawa weng be duyemeko, mali kawtiw ilo diwye-meko, geeyemkabe Sunbin-Got ete kuw te. Ete kuw ki keko, mali kawtiw ilo sunsun finik so bin dukayembomi, mali ilo e fikiw koyemkabe te. Kate, yukalem awkunum kumel ilo diweko, geeyemkabiliw kunum waneng yu kante keko, kanekabiliw a?*

Ibik em Kaneloke Eisneng Nu Akokow Kebuluw em Weng te.

¹³⁻¹⁴ Nakunum kumel ibolow benemin weng bakabiliw kunum waneng yutaka! Sow kutim em keloke eisneng mak alik nu atin kuw akokow kasike, mali kawtiw yu bokolomeliw: “Kame o, sow kutim danum o, itol makmak beem ding dim bakate, nu abiw mutuk fian kalo uneko, tum win on kisol fian mak kulokoluw te!”, angbiliw kawtiw yu kilele ibolow fukunemoliwka! Kawtiw num finik so buluw ding kale kel, nu weing deik atew keko, sukum ding kuw keko, banimkabuluw kasike,*

¹⁵ yu yom sowem kelomin beem dulum elote weng mak memen keko, bokolomeliw: “Sunbin-Got e akalem ibolow geleweko, finik so bin duyeme tewe, nu mesesem eisneng be fein kelewemokoluw te.”, angboliwka!

¹⁶ Kate, yu bolbol kebom akate, yukalem wiin kuw daoko, dawsulkabiliw kasike, wa kuw keka-biliw te.

¹⁷ Kasike, yu kilele ibolow fukunemoliwka! Yu ken kelomin eisneng mak atemsomi, kal kebiliw

* **4:12:** Ulom 2:1; 14:4 * **4:13-14:** Sim Fut 39:5,11; Ken Abin 27:1; Iluk 12:18-20

tewe, yu ken eisenng be fein kemoliwka! Kelinba keliw tewe, yu sili sili kawtiw keko, sen so keka-biliw kasike.*

5

Emso Kawtiw im Weng te.

¹ Emso kawtiw yutaka! Yu ibik em keyemoke ilum fian eisenng beem ibolow fukuneko, amebom, boliwka!

² Nimtew angom? Yom on kisol mesesem eisenng be alik alik kow tebilko, musmus teinei, yom ilim kait akati telmin so tanambi so ite tom fingeleko, wansiliw kasike.*

³ Yutaka! Fefe ding kelomin mewso kebe akate, yu kawin dim kaleem on kisol kuw kuluko, duku duku iti tikin tikin kelewsomi, mali ilo beso dokoyeminba kekabiliw te. Kasike kame, yom bonggu duku kebiliw musmus teineko, kow tebilkabe on kisol beem yulo geeyemin weng beem mongom ete Sunbin-Got e yulo fein ais dong tem da koyemoke te.

⁴ Yu kilelbi boliwka! Yu mali kawtiw ilo bokoyemomeliw: “Kame yu nem yong aluwbamin beni nem am gemin aluwbamin be aluwbabiw tewe, yu kanebiliw beem yan kulokoliw te!”, yangbiliw kate, yusik ilo yan ki ke weyeminba kebiliw kasike, auk so kitil nam Sunbin-Got e em banim kawtiw biim ibolow mesem keliw so, im gaanin beso atemeko, kiliyemkabe te.*

⁵ Feinka! Yukalem kaing kilele kaabom, biliwi, fasuko, tugul aliw fian kelei, an wanekabiliw

* 4:17: Iluk 12:47

* 5:2: Matyu 6:19

* 5:4: Sawa Weng

24:14-15

emdiw yukalem ibolow kal anggил beelo kuw geleweko, beem dulum fukuneko, fasu kolew kekabiliw te. Kate, Sunbin-Got akal yulo yenomin memen kebe te.*

⁶ Feinka! Yu mali kiol kuw sen so banim kawtiw ilo sak mongom banim geeyemeko, yeniwi, i kuankabiliw kate, ikati yulo maka mak duyem-inba kekabiliw te.

Kal Ilum Ding em Weng te.

⁷ Nakunum kumel kunum waneng yutaka! Yu gal kelinba kesomi, Kamok Fian em iti toloke ding feneko, kitil kuw boliwka! Yukalem suuk so ataan so im ding feneko, wanin musun kailiwi, dem gilako, “Yom keloka!”, angomi, beem ding fen alakabiliw atew keboliwka!*

⁸ Beemdiw, anggил illum ding dim bakate, yukati kitil kuw keko, ding fenbomi, gal kelinba keboliwka! Nimtew angom? Kamok Fian em toloke ding e kame mewso kebe kasike.*

⁹ Nakunum kumel kunum waneng yutaka! Yom diwyemeko, geeyemboke Kamok Fian akati memen keko, abisom dim moko, mewso tolomin kebe kasike, yu kanelom mali fein ibolow so kunum waneng iso weng anyam bokolew bokolew kemokoliw te!

¹⁰ Nakunum kumel fein ibolow so kunum waneng yutaka! Yu Kamok Fian em bontem dim bakamin kunum im kanemaliw kukuw be kilele diweko, atebamoliwka! Kal anggил illum tele ding dim bakate, ikal gal kelinba kesomi, kitil kuw ke mo kemaliw kasike.

* 5:5: Iluk 16:25 * 5:7: Sawa Weng 11:14; Selemaya 5:24

* 5:8: Ulom 13:11-12; 1 Fita 4:7

¹¹ Mali kawtiw mak im kal anggил illum kuluko, kalaing kuw keko, kitil ke mokabiliw kawtiw biim kukuw e nu atemeko, im wiin daoyemkabuluw te. Mak kunum mak kaneko beem illum daokemin kukuw gelewse em sang nu kal kesomi, kilikabuluw te. Kunum beem wiin e Sow ete te. Beem sang e nu Kamok Fian em elo kinkin so folok so ibolow be kilele atemeko, em “Kaneloki!”, angse weng beem dem ken ati kilele atemeko, kal kekabuluw te.*

Ayem Fawtuk Kemin em Weng te.

¹² Nakunum kumel kunum waneng yutaka! Emisik eiseneng yu kilel kal kemokoliw e kanekote: Yu kanelom abiil tikin em dulum beni kawin dim kaleem dulum elote yukalem sak weng beelo kitil keleweko, im wiin dim e ayem fawtuk weng mak kemokoliw te! Kate, yu “Fein!” akal “Fein te!”, “Ba!”, akal “Bate!”, angboliwka! Mesik esik Sunbin-Got e yom angbiliw weng be diweko, geeyemoke kasike.*

Sunbin-Got eso Weng Bakamin em Weng te.

¹³ Nakunum kumel kunum waneng yutaka! Yom biliw e mali kunum waneng mak kal anggил illum kuliw tewe, i Sunbin-Got eso weng bakamoliwka! Beemdiw, yom biliw e mali kunum waneng mak kalfong so keliw tewe, i sim bokoko, Sunbin-Got em wiin fian daolew kemoliwka!

¹⁴ Yom biliw e mali kunum waneng mak wakamin so keliw tewe, i sios im kak yetebiliw

* **5:11:** Aneng Kolew 34:6; Sow 1:21-22; 2:10; Sim Fut 103:8

* **5:12:** Matyu 5:34-37

kunum ilo gaayemiwi, ite teleko, Kamok Fian em wiin dim e kimning eising atew fong gel kuluko, im kal dim kel dukuyem kesomi, elo dakalakamoliwka!*

¹⁵ Keyemsomi, fein ibolow so keko, Sunbin-Got elo dakalakamiw tewe, e wakamin kebiliw kunum waneng biilo iti ken keyemomi, im sili sili kukuw akal sak misim kuw kulu koyemoke te.*

¹⁶ Kasike, yukalem amen amen kuw yom sili sili kukuw be mali im kiin dim kaim dim kuw bokosomi, Sunbin-Got elo weng dakalaliwi, e wakamin kawtiw biilo ken keyembomaka. Feinka! Kiol kuw kekabiliw kawtiw im Sunbin-Got eso weng bakamin kukuw e fil atul so keko, dem gilakabe kasike.

¹⁷ Yu Elaisa em Sunbin-Got eso weng bokolewse em sang kale ibolow fukunina! E nukalem atew kun so kal so kunum kate, e kitil keko, Sunbin-Got eso weng bakabelei, Sunbin-Got em weng kiliko, suuk mit dalinba belei, yemamas kel itol kelei, gung kel kayow mak kese kale.*

¹⁸ Kebisomi, iti ibik ete, e Sunbin-Got elo dakalalei, iti suuk mit teleko, musun ok aboyemei, wanin musun dem gilase kale.*

Kuminiw Kawtiw im iti Dakayembin em Weng te.

¹⁹ Nakunum kumel kunum waneng yutaka! Nimin fein ibolow so kunum waneng ite mak fein weng em deiw kolewko, sili sili kukuw keliw tewe, fein deiw gelewbiliw kunum waneng yusik

* **5:14:** Mak 6:13 * **5:15:** Mak 16:18 * **5:17:** 1 Kamokim 17:1; 18:1 * **5:18:** 1 Kamokim 18:42-45

deiw feneko, ilo iti yemde matem ken dim elo keyemboliwka!*

²⁰ Yu kilele ibolow fukuneko, kal kemoliwka! Nimin kunum waneng ite mak beem kukuw be gelewko, kaneliw tewe, i kawtiw sili sili kukuw beem kuankemin deiw kolewoko, iti matem ken dim elo talbiliw kawtiw biilo dokoyemiwi, isik fein sunsun finik so bin kulokoliw te. Kaneko beem deiw bete, Sunbin-Got e sili sili kukuw demdem sak misim kuw kulu koyemkabe te.

Bete kuw. Nem fut weng boyemi fut kame kilaka.*

* **5:19:** Galesia 6:1 * **5:20:** Ken Abin 10:12; 1 Fita 4:8

**Sunbin-Got em Kitakamin Weng
The New Testament and part of the Old Testament in
the Bimin Language of Papua New Guinea
Nupela Testamen na sampela hap Oldpela Testamen
long tokples Bimin long Niugini**

Copyright © 2008 Bible Society of Papua New Guinea

Language: Bimin

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-10-03

PDF generated using Haiola and XeLaTeX on 18 Apr 2025 from source files dated 31 Aug 2023

bb2442dc-1805-519d-89d0-e1d6e66abeba